


Tertib Surah	Nama Surah	Bilangan Ayat	Bilangan Ruku'	Makkiyyah / Madaniyyah	Tertib Turun	Bilangan Paragraf
Ke-62	Al-Jumu'ah	11	2	Madaniyyah	Ke-110	3





### **Zaman Diturunkan**

Bahagian permulaan Surah al-Jumu'ah bermula dari ayat 1 hingga 8 diturunkan selepas peperangan Khaibar yang berlaku pada bulan Muharram tahun ke-7 Hijrah. Surah ini diturunkan selepas Abu Hurairah memeluk agama Islam, di dalamnya kesombongan dan keangkuhan orang-orang Yahudi dengan sebab keturunan dan ilmu yang ada pada mereka menerima pukulan yang teruk. Mereka diberitahu bahawa kenabian dan kerasulan bukanlah monopoli bangsa Bani Israil, Rasul yang terakhir telah dibangkitkan dari kalangan أُمِّيَّين iaitu Bani Isma'il. Bahagian kedua surah pula bermula dari ayat 9 hingga ayat 11 besar sekali kemungkinannya diturunkan sebaik sahaja peristiwa hijrah berlaku kira-kira 6 atau 7 tahun sebelum turunnya bahagian pertama surah. Di dalam Surah al-Jumu'ah umat Islam diarahkan beriltizam dengan jama'ah dan membentuk satu komuniti yang kuat, mereka diminta menjauhi sikap dan perangai orang-orang Yahudi.

### **Kelebihan Surah Al-Jumu'ah**

Rasulullah s.a.w. selalu membaca Surah al-Jumu'ah dan Surah al-Munafiqun dalam sembahyang Jumaat.

عَنْ عُبَيْدِ اللَّهِ بْنِ أَبِي رَافِعٍ، مَوْلَى رَسُولِ اللَّهِ صَلَّى اللَّهُ عَلَيْهِ وَسَلَّمَ قَالَ اسْتَخْلَفَ مَرْوَانُ أَبَا هُرَيْرَةَ عَلَى الْمَدِينَةِ وَخَرَجَ إِلَى مَكَّةَ فَصَلَّى بِنَا أَبُو هُرَيْرَةَ يَوْمَ الْجُمُعَةِ فَقَرَأَ سُورَةَ الْجُمُعَةِ وَفِي السَّجْدَةِ الثَّانِيَةِ: (إِذَا جَاءَكَ الْمُنَافِقُونَ) قَالَ عُبَيْدُ اللَّهِ فَأَدْرَكْتُ أَبَا هُرَيْرَةَ فَقُلْتُ لَهُ تَقْرَأُ بِسُورَتَيْنِ كَانَ عَلَيَّ يَقْرَأُ بِهِمَا بِالْكُوفَةِ قَالَ أَبُو هُرَيْرَةَ إِنِّي سَمِعْتُ رَسُولَ اللَّهِ صَلَّى اللَّهُ عَلَيْهِ وَسَلَّمَ يَقْرَأُ بِهِمَا

Sunan Tirmizi, Kitab Jumaat, Bab Bacaan dalam Shalat Jumaat, hadits 519, hadits sahih.

### **Perkaitan Surah Al-Jumu'ah Dengan Surah Sebelum Dan Selepasnya**

Di dalam Surah as-Shaff yang lalu telahpun dinyatakan untuk kejayaan umat Islam dalam jihad, mereka hendaklah berada dalam saf yang rapi selain bersatu padu dan mempunyai perancangan yang jelas. Di dalam Surah al-Jumu'ah ini pula dinyatakan bahawa umat Islam hendaklah berpegang teguh dengan al-Qur'an dan as-Sunnah. Mereka juga dituntut membangunkan satu masyarakat yang tersusun rapi dan berdisiplin, jika tidak umat Islam juga akan menjadi seperti orang-orang Yahudi yang diumpamakan dengan keldai yang hanya tahu memikul kitab-kitab tetapi tidak mengetahui apa kandungan dan ajarannya.

### **Beberapa Kata Kunci Dan Tema Utama Surah**

1. Dengan melantik Rasul terakhir dari kalangan أُمِّيَّين atau Bani Isma'il, pukulan yang teruk diberikan kepada kesombongan dan kebongkakan orang-orang Yahudi yang terlalu berbangga-bangga dengan ilmu dan keturunan mereka (Ayat: 2).
2. Perkataan اللهُ 2 kali digunakan di dalam surah ini, di dalam ayat ke-4 ia digunakan dengan ma'na



kenabian dan kerasulan dan di dalam ayat ke-10 pula, ia digunakan dengan ma'na harta kekayaan.

3. 4 Tujuan utama kebangkitan Rasulullah disebutkan, 3 daripadanya merupakan saluran dan jalan dan yang keempatnya merupakan matlamat dan tujuan. Membaca ayat-ayat al-Qur'an, mengajar al-Qur'an dan mengajar hikmat, tujuan ketiga-tiganya ialah tazkiah. Di dalam tazkiah pula ada 2 maksud, pertama; memperbaiki serta memperelokkan akhlak dan peribadi, dan yang kedua ialah memajukan diri. Tazkiah aqal fikiran ialah dengan memperbetulkan aqidah, tazkiah amalan ialah dengan memilih cara-cara Sunnah dan mengelak daripada Bid'ah, tazkiah niat bererti melakukan segala perkara kerana Allah, tazkiah individu, institusi keluarga dan masyarakat bererti memperelok dan memajukannya sehingga ia naik ke puncak kejayaan.

4. Perkataan ظَالِمِينَ digunakan 2 kali untuk orang-orang Yahudi, mereka terlibat dalam mendustakan ayat-ayat Allah dan banyak melakukan kejahatan-kejahatan yang lain. (Ayat: 5 dan 7).

5. Perkataan ذِكْرُ اللَّهِ juga 2 kali digunakan di dalam surah ini (Ayat: 9-10). Sembahyang dan khutbah Juma'at juga disebut sebagai ذِكْرُ اللَّهِ, umat Islam dianjurkan supaya mengingati Allah banyak-banyak walaupun setelah mengerjakan shalat Juma'at.